

miseratus Dux Romanus: immunitatem frustra sibi destinatum in affines eius transtulit, sibi verò quod vnum supererat honorem tribuit sepulturæ. Quam quidem multo post tempore deiectam, & suis etiam ciuibus incognitam, M. T. Cicero inter densissimos vepres se reperisse, & ignorantibus indicasse commemorat, vt in Tusculano suo scribens. Quantus homuncio, cuius semirutum bustum, sparsosque cineres, inuenisse gloriatur Romani princeps eloquij. Fortasse prolixius, quàm propositi necessitas exigebat, in illius memoriam dicta sint, cuius historiam nusquam deinceps in hoc opere occursum reor.

PYTHAGORAS.

IN Græciam transfretanti, primus Pythagoras occurrit Philosophus, & philosophici nominis inuentor: Hic Sami Demarato Patre genitus locuplete negotiatore, longè locupletior ipse negotiator mox futurus, deinde ab ætatis suæ primordiis, sapientiæ pariter atque honestatis arduum ac laboriosissimum, callem ingressus, natalis soli dereliquit angustias, toto orbe peregrinus, siquidem vt in historia Poëticis verbis vtar:

Vir